



Listovi...

## LISTOVI GRAČANIČKOG KALENDARA OD 9. 5. DO 1. 11. 2004-05-10

**8. 5. 2004.**

### **7. FESTIVAL DJEČJEG DRAMSKOG STVARALAŠTVA BOSNE I HERCEGOVINE**

...i pored uskraćivanja bilo kakve podrške nadležnih "kulturnih" instanci Tuzlanskog kantona, Federacije i države Bosne i Hercegovine, zahvaljujući angažovanju Bosanskog kulturnog centra iz Gračanice, te nekoliko sponzora koji su pritekli u pomoć – ipak održan u Gračanici - na radost najmlađih ljubitelja pozorišne umjetnosti i svih onih koji su uložili dosta truda da Festival opstane.

Tokom dva dana trajanja Festivala izvedeno je 13 predstava mladih glumaca iz svih krajeva naše zemlje. Bio je to susret mladosti iz Gračanice, Ugljevika, Banja Luke, Mostara, Sarajeva, Konjica, Bugojna i Bijelog Polja. Gračanica je bila grad mladih talenata, grad glume i pozorišta. Po odluci stručnog žirija, od ukupno 13 predstava najbolja je "Neka crvenkapica", koju su, prema ideji nastavnice Fikrete Ibralić, izveli članovi Dramske sekcije Osnovne škole "Hasan Kikić" iz Gračanice.

**9. 5. 2004.**

### **REDOVNI VOZOVİ NA PRUZI DOBOJ - TUZLA**

Nakon 12 godina ponovo će "tutnjati" vozovi Sprečkim poljem, za početak dva puta dnevno. Do sada su vozovi iz Tuzle dolazili do Petrova – sada produžuju do Doboja. Srećom, za 12 godina pruga "nije zahrđala".

**18. 5. 2004.**

### **NOVE DIONICE ASFALTA U DONJOJ ORAHOVICI**

Puštena je u promet dionica puta Basići – Rašljeva u dužini od 525 metara. Ukupna

**LISTAO:  
OMER HAMZIĆ**

vrijednost radova 37.934 KM; konstrukcija finansiranja: Općina 16.800 KM, građani 37.000 KM i Direkcija za puteve TK 17.700 KM. Krajem aprila asfaltirana je dionica Mala Rijeka – Kolačuša, dužine 920 metara. Vrijednost radova 84.700 KM; konstrukcija finansiranja: Općina 30.000 KM, građani 37.000 KM, Direkcija za puteve TK 17.700 KM. Dio puta od Fudbalskog igrališta do Tubića, dužine 232 metra, pušten je u promet 10. 5. 2004; Vrijednost posla 19.700; konstrukcija finansiranja: Općina 3.200 KM), građani 12.600 KM i Direkcija za puteve TK 3.900 KM.

**19. 5. 2004.**

### ... I GRAČANICI

Asfaltirana je ulica Donji Ritašići. Vrijednost radova oko 130.000 KM; 40.000 KM prikupili građani, 60.000 KM izdvojila Općina Gračanica, ostatak namiren iz drugih izvora. Na redu su trotoari i rasvjeta...

**20. 5. 2004.**

### DOBROTVORNA VEČERA ZA PROJEKAT "DEMINIRANJE KORITA RIJEKE SPREČE"

Budući da je deminiranje obalnog pojasa rijeke Spreče, duž nekadašnje linije razdvajanja zaraćenih strana preduslov za bilo kakvo planiranje optimalnog korišćenja tog resursa na duže staze, predstavnici općine Gračanica više puta su pokušavali to pitanje pokrenuti s mrtve tačke.

Kako su donatorska sredstva za deminiranje sve manja, a potrebe za uređenjem obala Spreče i korišćenje poljoprivrednih i drugih resursa oko Spreče sve veće, nametnula se potreba čvršćeg uvezivanja svih općina u zahvatu Spreče (Lukavca, Petrova, Gračanice, Doboj Istoka i Doboja), povezivanja entitetskih institucija (jer je Spreča granična rijeka između entiteta), institucija Tuzlanskog kantona, nevladinog sektora, zainteresovanih privrednih i drugih subjekata na zajedničkom projektu uređenja korita Spreče, koji u prvoj fazi

podrazumijeva deminiranje, a u drugoj fazi uređenje kompletnog vodotoka i njegovu ekološku zaštitu.

Oko ove inicijative, početkom aprila, u Gračanici su se okupili načelnici svih 5 spomenutih općina i formirali inicijativni odbor za organizovanje dobrotvorne večere, s ciljem prikupljanja početnih sredstava za pokretanje tog velikog projekta.

Kao osnova za otvaranje tog pitanja poslужili su sljedeći podaci:

Općina Gračanica zauzima površinu od 212,3 km<sup>2</sup> i ima oko 55.000 stanovnika. Prema Elaboratu generalnog izviđanja koje su izveli izviđači BH MAC-a 2001. godine, rizične površine od mina čine 7,2 km<sup>2</sup> ili 3,37 % od ukupne površine općine.

Sve rizične površine na području općine Gračanica svrstane su u 21 pojedinačni projekat, od čega je 14 projekata I kategorije (stvaranje uslova za održivi povratak, infrastruktura) i 7 projekata II kategorije (poljoprivredno i šumsko zemljište). Do sada je na području općine Gračanica deminirano 47 470 m<sup>2</sup> rizičnih površina.

Od 21 pojedinačnog projekta, koje je obradio i kandidovao za deminiranje Općinski štab CZ, 10 projekata se odnosi na lokalitete u Sprečkom polju, a u toku je izviđanje i izrada elaborata za projekat "Obala i korito rijeke Spreče". Ovaj projekat BH MAC realizuje u saradnji sa svim općinama kroz čija područja protiče rijeka Spreča, kako u Federaciji BiH, tako i u Republici Srpskoj.

Ukupna kandidovana površina za deminiranje u Sprečkom polju u općinama Lukavac, Gračanica, Petrovo, Doboj Istok i Doboj je oko 4 122 500 m<sup>2</sup>. Kako je rijeka Spreča

bila linija razgraničenja AR BiH i V RS, ostao je veliki broj minskih polja, čija identifikacija i danas traje. U nekoliko minoincidenata koji su se desili na području ovih općina smrtno je stradalo 24 lica, a 22 su povrijeđena.

Rizične površine od mina uz rijeku Spreču su prepreka realizaciji projekta čišćenja i

produbljivanja njenog korita, kao i izradu odbrambenih nasipa od poplava kojese u posljednjih nekoliko godina nanijele milionske štete poljoprivrednim uslovima, privrednim i stambenim objektima, infrastrukturi i slično. U velikim poplavama u ljeto 2001. godine samo na području općine Gračanica nastala je šteta od 3.109.970,000 KM. Regulacijom korita rijeke zaštitilo bi se oko 3820 ha poljoprivrednog zemljišta (u općini Lukavac 150 ha, Gračanici 1750 ha, Petrovu 810 ha, Doboju Istoku 300 ha i Doboju 800 ha), oko 1600 stambenih i oko 115 proizvodno-poslovnih objekata, 11 mostova i više desetina kilometara puteva svih kategorija i važnosti.

Na području općine Gračanica do sada je obrađeno 6 dijelova (dionica) projekta "Obala i korito rijeke Spreče", od Miričine do Donje Orahovice, ukupne površine 116 941 m<sup>2</sup>, a troškovi deminiranja ovog dijela iznosili bi 584.705,000 KM. Zbog veličine rizične površine od mina te šteta koje nastaju uslijed neregulisanog korita rijeke, a činjenice da je sve manje humanitarnog deminiranja, Općinski načelnik Nusret Helić je pokrenuo inicijativu da se zajedničkim snagama spomeutih pet općina organizuje dobrotvorna večera s ciljem da se skrene pažnja na ovaj veliki problem i obezbijede početna inicijalna sredstva za realizaciju zamašnog projekta deminiranja Spreče. Nakon dvomjesečnih priprema, Dobrotvorna večera je uspješno organizovana u sportskoj sali Luke, privukla je pažnju mnogih privrednika i visokih gostiju, među kojima su bili i Ministar civilnih poslova BiH Safet Halilović, predsjednik Vlade TK Bajazit Jašarević, te načelnici svih pet spomenutih općina. Prikupljeno je 150 hiljada KM. Najveći donator sa 100 hiljada KM bila je Vlada TK.

**21. 5. 2004.**

**MALEŠIĆI: ASFALTIRAN PUT KALESIJE – KAMENIK U DUŽINI OD 1.200 METARA**

Vrijednost posla 120.000 KM; konstrukcija finansiranja:

Općina 40.000 KM, građani 60.000 KM, ostali izvori 20.000 KM.

**25. 5. 2004.**

**DAN ODBRANE GRAČANICE: PREDSTAVLJENA "KNJIGA ŠEHIDA, POGINULIH BORACA I CIVILNIH ŽRTAVA RATA GRAČANICA 2002. – 2005."**

Po ocjeni mnogih, radi se o najznačajnijem izdavačkom projektu u historiji Gračanice. O značaju Knjige govorio je prof. dr. Omer Ibrahimagić iz Sarajeva. Priređivačima i autorima Omeru Hamziću, Osmanu Puškaru i Ibrahimu Nurkiću, zahvalili su se Kadir Mehanović u ime Organizacije porodica šehida i poginulih boraca i Nusret Helić, općinski načelnik, u ime općine Gračanica, koja se pojavljuje kao izdavač i glavni finansijer projekta. Suizdavač je Izdavačka kuća "Monos" Gračanica. U narednih nekoliko dana Knjiga je predstavljena u još devet većih sela na području općine Gračanica. Nakon predstavljanja, Knjiga je uručena svim članovima porodica šehida i poginulih boraca na općini.

**27. 5. 2004.**

**44. SJEDNICA OPĆINSKOG VIJEĆA GRAČANICA: NEZADOVOLJNI ŠTO NIJE PRIHVAĆEN NJIHOV PRIJEDLOG DA SE NE RAZMATRAJU IZVJEŠTAJI O RADU DOMA ZDRAVLJA, OPĆE BOLNICE I GRADSKE APOTEKE, ZATO ŠTO NE SADRŽE FINANSIJSKE POKAZATELJE VIJEĆNICI SDA NAPUSTILI SJEDNICU**

...a u tako okrnjenom sastavu Vijeće je usvojilo, uglavnom bez rasprave, nekoliko izvještaja i informacija, među kojima i izvještaje o radu Opće bolnice, Doma zdravlja i Gradske apoteke, o materijalno-socijalnom položaju članova boračkih organizacija, o stepenu zagađenosti vodotoka, o stanju u oblasti kulture itd. Formirana su i dva nova radna tijela Vijeća: Komisija za ravnopravnost spolova i Komisija za budžet. Odluka o dodjeli ovogodišnjih priznanja izazvala je burnu reakciju i odbijanje od strane nekoliko vijećnika, pa zato nije ni mogla biti prihvaćena.

**31.05. 2004.**

**VANREDNA SJEDNICA OPĆINSKOG VIJEĆA  
GRAČANICA: USVOJENA ODLUKA O DODJELI  
OVOGODIŠNJIH OPĆINSKIH PRIZNANJA.**

Nakon što se nisu mogli usaglasiti oko te odluke na prethodnoj, redovnoj sjednici, zakazana je vanredna sjednica na kojoj su se vijećnici konačno odlučili koga će (a koga neće) pohvaliti i nagraditi za predstojeći Dan općine.

**2. 6. 2004.**

**DAN OPĆINE GRAČANICA: SPISAK DOBITNIKA  
TRADICIONALNIH OPĆINSKIH PRIZNANJA**

Zlatna plaketa općine Gračanica: Mjesna zajednica Gornja Orahovica i firma "Plamingo" Gračanica; Srebrna plaketa općine Gračanica: KUD "Adem Alić" Gračanica, "Trgoplast-trans" Gračanica, Hrvatsko katoličko dobrotvorno društvo Gračanica; Zlatna značka općine Gračanica: Muhidin Halilović Gračanica, Zehra Karahasanović Gračanica, Lilian Čolić Gračanica; Srebrna značka općine Gračanica: Tajib Alić Doborovci, Ismet Đulić Gračanica, Fikreta Ibralić Gračanica, Mustafa Topčagić Soko i Nusreta Ustavdić Gračanica.

**2. 6. 2004.**

**DAN OPĆINE GRAČANICA: SVEČANA AKADEMIJA,  
PODSJEĆANJE NA OSTVARENE REZULTATE IZMEĐU  
DVA PRAZNIKA**

Iz referata Općinskog načelnika Nusreta Helića "... Budući da se kod nas i mnogo važnije stvari podvrgavaju stalnoj sumnji i preispitivanju, što ponekad i nije tako loše, ne treba da čudi činjenica što se i ovaj datum iz povijesne riznice ovoga kraja, koji je ubilježen u najstariji pisani pomen srednjovjekovnog grada Sokola kao historijskog simbola Gračanice – i dalje osporava i dovodi u pitanje kao Dan općine, iako je ustanovljen upravo na tom bogatom historijskom i civilizacijskom iskustvu. Zato ima smisla ovo historij-

sko podsjećanje koje ukratko glasi: današnji datum ispisan je 1429. na jednom zvaničnom pravnom aktu, koji potvrđuje promjenu svojinskog statusa srednjovjekovnog kraljevskog grada Sokola, u čijem se podgrađu razvila Gračanica. To je najstariji pisani dokument o tragovima ovoga grada u dalekoj prošlosti. Opredjeljenje za ovaj datum "duboko u njedrima prošlosti ovoga kraja", nije bilo posljedica nekih političkih promjena, pomodarstva ili poznate prakse - da svaka nova vlast uvodi svoje praznike i blagdane – već naprotiv. Ovo sam morao naglasiti ne zbog dobronamjernih pitaca, već zbog onih koji od svega i svačega vole da prave politiku, pa zašto je ne bi pravili od povijesti i povijesnih događaja koje mogu tumačiti onako kako im najbolje odgovara. To uostalom nije ništa novo na ovim našim prostorima.

Obilježavajući ovaj datum iz srednjovjekovne državne povijesti Bosne mi simbolično potvrđujemo i ponovo reafirmišemo činjenicu da smo, evo da kažem, kao Bosna, baštinioci srednjovjekovne bosanske državnosti - ravnopravno, sva tri sadašnja konstitutivna dijela bosanske avlije – i Bošnjaci i Srbi i Hrvati i odvojeno i zajedno. Niko nema pravo da bilo koga izvlaćuje i da mu negira to pravo. Uvodeći ovaj datum, željeli smo odagnati sve političke i druge zablude oko tog našeg srednjovjekovlja – kojeg jedni iz neznanja ili ko zna zašto potpuno odbacuju, a drugi upravo to jedva i čekaju, kako bi taj značajan segment naše historije prigrlili sebi i lakše ga oduzeli od drugih.

Posljedice – znamo kakve su.

Ja se nadam da su građani Gračanice ovaj datum prihvatili s uvažavanjem. Želio bih da ga obilježavamo kao praznik svih građana bez obzira na bilo kakav ideološki ili nacionalni predznak. Činit ćemo to s radošću, optimizmom, i otvorenih perspektiva – uprkos tmurnim oblacima koji se ponekad suviše nisko nadviju iznad naših glava."

**2. 6. 2004.**

**DAN OPĆINE: ZAPOČETA IZGRADNJA MUZIČKE ŠKOLE, PUŠTENA U RAD NOVA POGONSKA POSTROJENJA GRAČANIČKE ŠTAMPARIJE "GRIN", OTVOREN ZA SAOBRAĆAJ PRIKLJUČNI PUT NA MAGISTRALU DOBOJ - TUZLA KROZ GRAČANIČKO NASELJE LIPINAC**

Uz objekat osnovne škole "Hasan Kikić", muzička škola treba da "nikne" za nepuna 4 mjeseca. Predračunska vrijednost oko 200.000 KM; izvori: donacije roditelja, pomoć dobrotvorke Ledi Not, sredstva škole "Hasan Kikić". U gračaničkoj štampariji "Grin" izvršena promocija certifikata ISO-standard i puštena u pogon moćna grafička linija, "petobojka" u vrijednosti od 1,5 miliona KM, što ovoj firmi obezbjeđuje vodeće mjesto u svojoj branši na tržištu Bosne i Hercegovine. Asfaltirana saobraćajnica na Lipincu, u dužini od 600 metara, koja obezbjeđuje Gračanici alternativni izlaz, odnosno ulaz iz pravca Doboja i znatno rasterećuje postojeći priključak kroz naselje Luke. U finansiranju projekta, čija je vrijednost 142.000 KM, učestvovali su Općina sa 35.000 KM, građani sa 35.000 KM, a ostatak od 72.000 KM obezbijeđen je iz ostalih izvora (preduzeća).

**3. 6. 2004.**

**JOŠ JEDAN DOBRO OBAVLJEN POSAO KOMPANIJE "ŠIRBEGOVIĆ" IZ GRAČANICE: ZAVRŠEN I OTVOREN TRGOVAČKO-DISTRIBUTIVNI CENTAR "VELPRO" U SARAJEVU, POVRŠINE OKO 8.500 KVADRATNIH METARA –**

Kompanija "Širbegović" na tom objektu, prije ugovorenog roka, izgradila je montažno-betonsku konstrukciju, čelične nadstrešnice i dijelove metalne konstrukcije, te se tako kvalifikovala za dalju poslovnu saradnju sa hrvatskim koncernom "Agrokor" kao glavnim investitorom na tom projektu... Izgradnja hladnjača od 1.500 kvadratnih metara za fabriku "Ledo" u Mariboru, još jednu članicu "Agrokora", novi je posao koji je taj veliki hrvatski koncern povjerio kompaniji "Širbegović" iz Gračanice.

**5. 6. 2004.**

**MIRIČINA: NOVI DOM KULTURE**

Naporima mjesne zajednice i mještana Miričina je dobila moderan objekat za bogatiji društveni i kulturno-zabavni život i okupljanje omladine u tom selu. Gradnju objekta, pored općine Gračanica, pomogla je i bratska općina Kadonege iz Italije.

**5. 6. 2004.**

**DRAMSKI STUDIO KUD "ADEM ALIĆ" GRAČANICA: "U ZVORNIKU JA SAM OSTAVIO SVOJE SRCE"**

Poznata drama Abdulaha Sidrana bila je veliki izazov za gračaničke glumce-amatere. Odigrali su je vrlo uspješno i podarili izvanredan pozorišni ugođaj svojim sugrađanima. Pokazali su da se snagom svog talenta, volje, entuzijazma i srca mogu uhvatiti u koštac i sa najzahtjevnijim dramskim tekstovima i najkomplikovanim predstavama. Odabrana družina Miralema Džaferovića, čiji je rahm. otac Hasib nekada oduševljavao gračaničku publiku sa iste pozornice, uspješno je položila još jedan ispit. Sa nekim malim izuzecima, ansambl se doimao kao vrlo uigran, uvježban i usklađen orkestar koji je uspio zadržati pažnju publike od početka do kraja predstave. Bilo je to jedno snažno podsjećanje na minulo ratno vrijeme, na bolne trenutke bošnjačkog naroda i dramatične sudbine pojedinca u stravičnom vihoru rata, ljudskog bezumlja i pesinluka. Kontrastirajući, vrlo uspješno, plavetnilo i čistoću vode Drine, kao simbola života, sa smrdljivom atmosferom provincijalnog bordela, gračanički amateri su uspjeli na svoj način iskazati ljudsku i patriotsku poruku ovog Sidranovog teksta: "Tamo gdje je srce, tamo je i dom."

**30. 6. 2004.**

**45. SJEDNICA OPĆINSKOG VIJEĆA GRAČANICA:  
USVOJENI IZVJEŠTAJI I INFORMACIJE O RADU U  
2003. GODINI...**

...Općinskog pravobranilaštva, Porezne ispostave, Općinskog suda, Općinskog suda za prekršaje, zatim o stanju lokalne putne mreže i signalizacije, o materijalno-socijalnom položaju izbjeglih i prognanih lica. Usvojena je Odluka o promjeni statusa nepokretnosti u opštoj upotrebi i Nacrt odluke o utvrđivanju mreže zdravstvenih djelatnosti i zdravstvenih ustanova primarne zdravstvene zaštite u Tuzlanskom kantonu.

**1. 7. 2004.**

**LJETNE VEČERI POD LIPAMA GRAČANICE – DRUGI  
PUT**

Prošlogodišnje “Ljetne večeri...” naišle su na dobar odziv gračaničke publike, pa se glavni organizator manifestacije – Bosanski kulturni centar Gračanica - uz podršku i pokroviteljstvo Općine Gračanica, potrudio da ovog ljeta Gračanlijama priredi još bogatiji program. “Ljetne večeri pod lipama Gračanice 2004.” otvorene su promenadnim koncertom orkestra limene glazbe “Konjuh” iz Živinica i koncertom saza na terasi Osman-kapetanove medrese. Programom “Večeri” predviđeno je tridesetak zanimljivih programa, koji će se realizovati toko jula i avgusta na terasi Osman-kapetanove medrese, na otvorenoj sceni u centru Gračanice, Domu kulture i bazenima “Nasko”.

**10. 7. 2004.**

**SPREČA I SPREČKO POLJE: TRUJ ME ŽIVOTE TRUJ**

Kad god se pokrenu takozvani veliki hemijski kapaciteti u Gradu soli i niže od njega, po pravilu stradaju ribe u Spreči, digne se galama i graja, jave se i ekolozi pričalice i teoretičari, digne se hajka za krivcima, čekaju se analize i ekspertize, zasjedaju općinari, protestira načelnik, ribari lijepe plakate, okrivljuju-

ći političare što im zagađuju Spreču, a ne vide koliko im isti zagađuju život, drže se konferencije za tisak, snimatelji snimaju crknute ribe... Potom se sve zaboravi. Do novog trovanja. Ko te pita za ribu? Kupit će se ribarima koja tona ribe i tako će se namiriti računi. Do novog trovanja, politikom i smrdljivom vodom koja teče koritom Spreče i polahko otima od ljudi ono što im je Bog dao: jedni zemlju (tlo), drugi mozak (zdrav). A krivca nema, pa nema. Svi smo krivi, a najviše oni što žive u blizini te smrdljive vode. Neka se malo udalje, a za ribe ćemo lahko, kupit će se koja tona... Tako se i ovoga puta orkestriralo po Gračanici. Uprazno. Po ko zna koji put...

**15. 7. 2004.**

**TREĆA VANREDNA SJEDNICA OPĆINSKOG VIJEĆA:  
INFORMACIJA O ZAGAĐENJU RIJEKE SPREČE**

Nakon svestrane rasprave Vijeće je usvojilo sljedeće zaključke i mjere: “1. Dati punu podršku i pomoć kantonalnom tužiteljstvu u otkrivanju počinitelaca trovanja ribe u rijeci Spreči i poduzimanju zakonom predviđenih mjera protiv istih; 2. Da se uputi oštar protest – zahtjev prema Vladi Tuzlanskog kantona, nadležnim ministarstvima i drugim kompetentnim tijelima i zatražiti da se u skladu sa zakonom o vodama i Krivičnim zakonom i drugim propisima izvršavaju svoje obaveze; 3. Općina Gračanica će pružiti svaku stručnu i pravnu pomoć poljoprivrednim proizvođačima u dolini rijeke Spreče u pokretanju spora protiv izazivača trovanja; 4. Upoznati nadležne organe OHR-a; 5. Uraditi Informaciju o posljednjem zagađenju rijeke Spreče i poduzetim aktivnostima koje će se razmatrati na vanrednoj sjednici Općinskog vijeća; 6. Javnost će biti kontinuirano obavještavana o rezultatima i poduzetim mjerama.” To je, dakle, to. Svi odradiše svoj posao. Do novog trovanja.

**16. 7. 2004.**

### **NOVA KUĆA "VARIPLASTA"**

Riječ je o jednoj od vodećih firmi među gračaničkim plastičarima, koja je počela sa radom prije dvadesetak godina u malim radioničicama u Malešićima. Za samo nekoliko mjeseci, "Variplast" je podigao i uselio u novi proizvodno-poslovni objekat – prostranu halu sa kancelarijama i ostalim pratećim prostorijama - u neposrednoj blizini Etivaže, u kojoj je do sada organizovao proizvodnju. Novi prostor otvara mogućnost za dalji razvoj proizvodnje – posebno na programima ambalaže.

**30. 7. 2004.**

### **GRAĐEVINSKA KOMPANIJA "ŠIRBEGOVIĆ": U ELITNOM DRUŠTVU**

Kao najuspješnija na području Tuzlanskog kantona, uz Fabriku cementa Lukavac, ta se kompanija našla na 32. mjestu rang liste "100 najvećih firmi u BiH", koju svake godine objavljuju "Poslovne novine". Kao najveći izvoznik sa područja Tuzlanskog kantona, na objavljenoj listi najvećih izvoznika u Federaciji Bosne i Hercegovine, zauzela je dobro 17., a po ostvarenoj dobiti na rang listi najuspješnijih, 15. mjesto. Obim izvoza u prošloj godini: oko 11, a dobit preko 1,6 miliona KM .

**16. 8. 2004.**

### **GRAĐEVINSKA KOMPANIJA "ŠIRBEGOVIĆ": "U NOVOM SADU, U NOVOM SADU..."**

Potpisan je vrijedan ugovor sa firmom "Rodić M&B Co" iz Kule, po kojem će se u rekordnom roku od dva mjeseca izgraditi vrlo zahtjevan objekat u Novom Sadu, površine 14.000 kvadratnih metara, kao proširenje kapaciteta Pivare "Rodić". Riječ je o nastavku uspješne poslovne saradnje sa spomenutim investitorom, za kojeg je Kompanija "Širbegović" izgradila više poslovnih objekata, ukupne površine od oko 50.000 kvadratnih me-

tara. Do kraja godine sa istim investitorom očekuje se potpisivanje ugovora za izgradnju još nekoliko objekata u Novom Sadu i Beogradu, ukupne površine od oko 45.000 kvadratnih metara. Tako se nastavlja uspješan nastup "Širbegovića" na tržištima susjednih zemalja.

**21. 8. 2004.**

### **SREBRENİK: OTVOREN "OTVORENI GRAD UMJETNOSTI 2004. GODINE"**

Dan ranije počelo je tradicionalnim konjskim trkama i promocijom sabranih djela Abdulaha Sidrana, a otvaranje je upriličeno uz prisustvo brojnih gostiju, zanimljivim recitalom članova Narodnog pozorišta iz Tuzle pod nazivom "Slovo o gradu". Pored rada umjetnika po slobodnom izboru, tokom ove velike kulturne manifestacije organizovano je više promocija knjiga, te prikazano nekoliko filmova sa "Sarajevo film festivala". Promovisana je "Alternativna historija" Semira Osmanagića, pjesnička zbirka "Grafiti duše" Jasmina Habibovića, zbirka starih razglednica i fotografija "Prošlost i sadašnjost Srebrenika", "Monografija Špionice" Nikole Veselčića, predstavljen je roman "Iz pozadine" Zlatica Dukića, te sedmi broj Časopisa za kulturu i društvena pitanja "Stav" iz Tuzle. Priređeno je i nekoliko muzičkih priredbi, izložbi slika i knjiga, a izvedena je i pozorišna predstava "Mušica", koju je izveo ansambl Narodnog pozorišta iz Tuzle. Od 20. avgusta do 6. septembra Srebrenik je doista bio u doslovnom smislu grad umjetnosti i ljepote, otvoren za sve koji ga vole.

**25. 8. 2004.**

### **VRANOVIĆI: ASFALTIRAN PUT NA RELACIJI POTOK – PLANE**

U dužini od 1380 metara taj putni pravac povezuje Vranoviće sa Srebrenikom i Gračanicom. U njegovu rekonstrukciju i asfaltiranje uloženo je 190.000 KM, od čega su građa-

ni obezbijedili 65.000 KM, Direkcija za puteve 8.000, a ostatak sredstava u iznosu 117.000 KM Općina Gračanica.

**27. 8. 2004.**

### **"GRAČANIČKI GLASNIK": PROMOCIJA INTERNET IZDANJA**

Iako se on-line izdanje "Gračaničkog glasnika" više od dvije godine nalazi na internetu (na adresi <http://glasnik.gracanica.net>), javno predstavljanje Internet izdanja tog Časopisa obavljeno je u okviru ovogodišnje manifestacije "Ljetne večeri pod lipama Gračanice". Promocija je obavljena u ugodnom ambijentu kafea "Film" gračaničkog Doma kulture. Prezentirano je elektronsko izdanje svih dosadašnjih 17 brojeva Časopisa, naslovi priloga i imena svih 250 autora i saradnika, koji su se pojavljivali na stranicama "Gračaničkog...". O značaju ovog projekta za Gračanicu, posebno kada je u pitanju promociju kulturne baštine ovog područja u svijetu, govorili su članovi Redakcije Časopisa: prof. Dr. Izet Mašić, redovni profesor Medicinskog fakulteta u Sarajevu (na predmetima Porodična medicina i Medicinska informatika) i književnik Atif Kujundžić.

**30. 8. 2004.**

### **46. SJEDNICA OPĆINSKOG VIJEĆA GRAČANICA: USVOJENA ODLUKA O IZVRŠENJU BUDŽETA OPĆINE ZA PRVO POLUGODIŠTE 2004. GODINE I ODLUKA O PRISTUPANJU IZMJENI REGULACIONOG PLANA "CENTAR" - NOVELACIJA PLANA**

Za 2004. godinu općinski Budžet planiran je u iznosu od 6.579.000 KM: prihodi od poreza 3.327.000 KM, neporezni prihodi 2.150.000 KM i tekuće potpore 1.102.000 KM. Ostvarenje Budžeta za šest mjeseci ove godine pokazuje da je budžetski plan za 2004. godinu bio dosta realan. Ostvareni prihodi u ovom periodu iznose 2.909.161 KM ili 88,44 %, što je za 28 % više u odnosu na isti period prošle godine. Porezni prihodi su ostvareni sa 96,15 %, a neporezni 96,24 %. Po prvi

puta u historiji budžeta Općine Gračanica neporezni prihodi su ostvareni u većem procentu od poreznih, što je rezultat pojačanog i odgovornijeg rada općinskih organa i službi. Rashodi su ostvareni u skladu sa planom Budžeta. Ukazano je na slabu naplatu poreza od poljoprivredne djelatnosti i podbacaž u realizaciji grantova viših nivoa vlasti. Usvajanjem Odluke o pristupanju izmjeni Regulacionog plana "Centar" - novelacija plana otklonjene su prepreke za bržu realizaciju značajnih projekata u centru grada. Vijećnici su usvojili i Odluku o stipendiranju studenata i učenika srednjih škola, Odluku o utvrđivanju kriterija za dodjelu stipendija studentima i učenicima srednjih škola, Rješenje o davanju prava korištenja ribljeg fonda Udruženju građana SRD "Drijenča", Informaciju o ostvarivanju prava i izvršavanju obaveza općinskih službi na zahtjev građana za period januar – jul 2004. godine i Informaciju o vršenju inspekcijaskog nadzora u oblasti komunalne, urbanističko-građevinske, sanitarne, veterinarske, tržišne i turističko-ugostiteljske inspekcije na općini u periodu januar - jul 2004. godine.

**31. 8. 2004.**

### **ZAVRŠENE "LJETNE VEČERI POD LIPAMA GRAČANICE"**

Velikim gala-koncertom na otvorenoj sceni u centru Gračanice, kojem je prisustvovalo oko 3.000 posjetilaca, označen je završetak ovogodišnje kulturne manifestacije "Ljetne večeri pod lipama Gračanice". Obraćajući se okupljenim građanima, načelnik općine Nusret Helić je dao kratak rezime tog velikog posla: "Moram reći da sam sretan, prije svega kao građanin ove općine i ovoga grada, što smo u okviru ove kulturne manifestacije uspjeli pokazati duh ovoga grada, što smo ga digli iz mrtvila i sivila ljetne dosade i svakodnevnice, što smo na najbolji način pokazali kako se bošnjačka tradicija i naše kulturno nasljeđe može afirmisati bez trunke politike, interesnih i ko zna kakvih pretenzija.



Ova manifestacija je djelo svih nas, svih učesnika i onih pojedinaca koji su je osmišljavali i programirali. Posebno mjesto u tome zauzima Bosanski kulturni centar kao organizator.

U ime građana Gračanice i svih onih koji su ovog ljeta uživali "Pod lipama Gračanice" ja se zahvaljujem svim učesnicima manifestacije

i sa zadovoljstvom najavljujem "Ljetne večeri pod lipama Gračanice 2005.godine".

**4. 9. 2004.**

#### **OTVORENA NOVA DŽAMIJA U MIRIČINI**

Na atraktivnoj lokaciji, pored magistralnog puta Doboj – Tuzla, izgrađen je i otvoren funkcionalan islamski vjerski kompleks, kojeg čini novoizgrađena džamija sa munarom visokom 42 metra, sa dvije šerefe, gasulhana, abdestana i stambeni objekat za mjesnog imama. U gradnju tih objekata uloženo je oko 400 hiljada KM, a sredstva su najvećim dijelom obezbijedili džematlije Miričine. Svečanosti otvaranja džamije prisustvovalo je više hiljada vjernika, te visoki gosti iz vjerskog i političkog života, od kojih su se neki obratili skupu prigodnim govorima i čestitanjima.

Između ostalih, govorio je i naibu-reis hadži-hafiz Ismet ef. Spahić, koji je u svom govoru uputio oštre kritike općinskom načelniku Nusretu Heliću zato što je na jednu svoju izbornu afišu, kao ilustraciju dobre saradnje sa Medžlisom islamske zajednice, "stavio" neku, ranije snimljenu fotografiju sa grupom imama, među kojima je bio i sam ef. Spahić.



*Detalj sa svečanosti otvaranja džamije u Miričini (Foto Šako)*

Optužujući načelnika za zloupotrebu vjere u predizborne političke svrhe, otvoreno je pozvao vjernike da na predstojećim lokalnim izborima paze za koga će glasati, te da daju glas onim kandidatima koji nisu "bezbožnici i nevjernici". Vjerovatno zbog toga, protokolom svečanosti, načelniku Heliću nije ni data prilika da se obrati skupu i pročita svoj pripremljeni govor. Čitav taj slučaj izazvao je kontroverzne komentare i različite reakcije u javnosti. Da bi "spustio lopticu na zemlju", načelnik Helić je javno poručio da će se i dalje zalagati za korektne odnose i saradnju sa svim institucijama Islamske zajednice, bez obzira što je "slučajem Miričina" razočaran i kao čovjek i kao vjernik.

**4. 9. 2004.**

#### **... I ZGRADA PARALELNE OSNOVNE ŠKOLE ZA MUZIČKO OBRAZOVANJE U GRAČANICI**

Kamen temeljac za taj objekat zakopan je prigodom obilježavanja Dana općine, 2. juna 2004. godine. Za samo nekoliko mjeseci, uz zgradu Osnove škole "Hasan Kikić" izgrađen je vrlo funkcionalan objekat sa odgovarajućim kabinetima za individualnu nastavu

i salom za kulturno-umjetničke programe. U izgradnju objekta uloženo je 350 hiljada KM. Najveći iznos od oko 200 hiljada KM prikupila je i donirala poznate dobrotvorka Gračanice Miloške Not. Ostatak su obzbijedili roditelji i općina Gračanica, a dio sredstava je osiguran iz donacija nekoliko gračaničkih firmi.

Na svečanosti povodom otvaranja škole, u svom kratkom obraćanju načelnik općine Nusret Helić, između ostalog rekao je i ovo: "Otvaranjem ovog objekta stvorili smo uslove za dalje unapređenje i njegovanje muzičke kulture u našem gradu, za školovanje naših talenata koji već sada, svojim umjetničkim izrazom i svojim uspjesima na svjetskoj muzičkoj sceni pronose slavu Gračanice takoreći širom svijeta. Ovo je veliki dan za Gračanicu i dalji razvoj kulturnog života na našoj općini, ovo je objekat kojim Gračanicu na najbolji način činimo gradom."

Nakon otvaranja objekta, učenici muzičke škole izveli su prigodan kulturno-umjetnički program u kojem su se predstavili najbolji solisti na klaviru, gitari i harmonici, te orkestar harmonika, Plesna grupa "Plamingo", vokalna grupa "Arabeske", tamburaški orkestar i folklorna grupa KUD-a "Adem Alić" iz Gračanice. Posebno je bio zapažen nastup mladog klaviriste Zorana Imširovića (rođen 1979., đak Muzičke škole u Gračanici), koji pohađa postdiplomski studij u Minhenu i nastupa kao solista, sa orkestrom ili kamernim sastavima širom Evrope. Riječ je visoko nadarenom muzičaru, koje muzički kritičari prognoziraju sjajnu budućnost u svijetu muzike i muzičke umjetnosti.

**6. 9. 2004.**

### **GRAČANICA: PRVI SEMAFORI NA GRADSKIM RASKRSNICAMA**

Puštanjem u rad semafora na tri glavne raskrsnice u gradu: kod Osnovne škole "Hasan Kikić", kod šumarije (na raskrsnici za mahalju Lipa) i kod Doma zdravlja sigurnost saobraćaja znatno se poboljšava. U ovaj proje-

kat Općina je uložila oko 150.000 KM, a Gračanica dobila još jedno gradsko obilježje.

**11. 9. 2004.**

### **"SELJO" IZ SARAJEVA PRVI PUTA U GRAČANICI**

Akademski kulturni centar Univerziteta u Sarajevu "Seljo", svojim cjelovečernjim umjetničkim programom oduševio je gračaničku publiku. Umjetničko veče na pozornici velike sale Doma kulture bilo je ispunjeno raznovrsnim muzičko-folklornim i plesnim tačkama vrhunskog kvaliteta i izložbom slika "Seljinog" likovnog ateljea u izložbenom foajeu Doma kulture. Amaterki kolektiv, koji je tokom 50 godina svog uspješnog djelovanja, prezentirao kulturnu tradiciju Bosne, posebno u oblasti folkloru i muzičkog stvaralaštva, širom zemaljske kugle, sticajem okolnosti nije ni jednom do sada gostovao u Gračanici. Od sada će, kako obećava, češće "navraćati" u Gračanicu – jer to žele Gračanlije.

**12. 9. 2004.**

### **RAŠLJEVA: JOŠ 1.700 METARA ASFALTA**

Vrijednost radova je 101.500 KM, od čega je Općina obezbijedila 85.000 KM i građani 16.500 KM. U junu je rekonstruisana dionica puta od 575 metara. Uloženo je 48.000 KM (građani 21.000, Općina Gračanica 19.000 i Direkcija za puteve TK 8.000 KM).

**14. 9. 2004.**

### **CIGLANA U SOČKOVCU NAPOKON U POGONU**

Ciglanja je osnovana daleke 1923. godine i u njoj je nalazilo zaposlenje na stotine Gračanlija. Nekada je bila među vodećim proizvođačima cigle u Bosni i Hercegovini. Prestala je sa radom na početku rata za Bosnu i Hercegovinu (1992. – 1995.). Prema pisanju sarajevskog "Oslobođenja" glineni i glinenobetonski elementi (paleta od 29 vrsta opekar-skih proizvoda), već polahko nalaze put do kupca. U Ciglani trenutno radi oko 60 radni-

ka, a o unapređenju proizvodnje brine vlastiti istraživački tim, čiji su stručnjaci usavršili proizvodni postupak u izradi dimnih i ventilacionih kanala, te materijal pod nazivom "tenisvit", koji se koristi za posipanje teniskih terena. Uvedena je i nova organizacija rada, a proizvodni škart smanjen na svega 5%.

**16. 9. 2004.**

### **PUŠTEN U RAD NOVA ASFALTN BAZA U GRAČANICI**

Gračanička građevinska firma "Roading" u opremu i postrojenja asfaltne baze uložila je oko 3 miliona maraka. Riječ je o modernom pogonu, kapaciteta 100 tona asfalta na sat, koji je izgrađen po svim svjetskim tehnološkim i ekološkim standardima. Puštanjem u rad ovog pogona gračanički "Roading" kvalifikovao se među vodeće kompanije u Bosni i Hercegovini u oblasti niskogradnje, odnosno izgradnje i rekonstrukcije putne mreže.

**22. 9. 2004.**

### **ČETRDESET SEDMA SJEDNICA OPĆINSKOG VIJEĆA GRAČANICA, POSLJEDNJA RADNA U OVOM SAZIVU**

...nije bila opterećena nekim teškim tačkama dnevnog reda. Vijećnici su usvojili više zaključaka i rješenja iz domena imovinsko-pravne službe, kako građani ne bi bili oštećeni čekajući novi saziv vijeća, koje će se konstituisati tek nakon oktobarskih lokalnih izbora. Bila je to prilika da se vijećnici osvrnu na rezultate svog rada u proteklom četvoro-godišnjem periodu. To je propušteno. Valjda nije adet. Izbori su na pragu.

**26. 9. 2004.**

### **ASFALT KROZ CENTAR MALEŠIĆA**

Nakon rješavanja nekoliko ključnih komunalnih pitanja u ovom selu (vodosnabdijevanje stanovništva čitavog sela, kanalizaciona mreža, javna rasvjeta), asfaltiranje puta Gračani-ca – Malešići glavni je prioritet rukovodstva u ovom selu. Dva kilometra asfaltiranog puta od

mahale Kalesije, kroz centar Malešića, do mahale Mešići, koji je pušten u saobraćaj uz skromnu svečanost, ključna je etapa na tom velikom poslu. Uloženo je oko 300.000 KM. To su sredstva građana i općine Gračanića. Akcija na izgradnji puta prema Gračanići se nastavlja...

**27. 9. 2004.**

### **... U TRNOVCIMA...**

Pušten je u saobraćaj put Trnovci - Džakule u dužini od 1458 metara. Vrijednost radova je oko 190.000 KM.

**29. 9. 2004.**

### **... I MAHALI JAVOR**

Rekonstrukcija i asfaltiranje puta Javor – Bahići koštala je 65.664 KM. Općina je platila 40.000 KM, građani 20.000 KM i iz ostalih izvora je obezbijedeno je 5.664 KM.

**29. 9. 2004.**

### **ASFALTIRANO JE IGRALIŠTE MALIH SPORTOVA U ŠKAHOVICI**

Sredstva je obezbijedila općina i mjesna zajednica iz dobrovoljnih priloga građana.

**2. 10. 2004.**

### **LOKALNI IZBORI**

...obavljeni su na 40 biračkih mjesta na području općine. Na glasanje je izašlo 16.104 ili 56,7% birača (za listu kandidata za članove Općinskog vijeća), odnosno 16.106 ili 56,7% birača (za listu kandidata za općinskog načelnika), što predstavlja najveću apstinenciju biračkog tijela od 1990. godine.

**4. 10. 2004.**

### **FILIJALA UPI BANKE U GRAČANICI PRESELILA U NOVE PROSTORIJE**

Počela je sa radom 1985. godine sa dva radnika, a 1995. godine stekla status filijale. Da-

nas ima 17 radnika, organizaciono joj pripada poslovnica u Odžaku, radi sa oko 500 pravnih i 2000 fizičkih lica. Plasmani na nivou Filijale iznose oko 35 miliona KM, od čega se na pravna lica odnosi 29, a na fizička 6 miliona KM. Po svojoj snazi UPI banka nalazi se među 5 prvih banaka u Bosni i Hercegovini.

**13. 10. 2004.**

### **FORMIRANO UDRUŽENJE "JOSIP BROZ TITO" U GRAČANICI**

Osnivačkoj skupštini prisustvovalo je preko 250 članova, koji su za predsjednika Udruženja izabrali Fikreta Konjića, novinara Radio Gračanice. U usvojenim programskim dokumentima posebno su istaknuti antifašistički ciljevi Udruženja, o kojima je nadahnuto govorio Ibrahim Nurkić, jedan od članova Inicijativnog odbora za formiranje Udruženja.

**30. 10. 2004.**

### **NOVA ZGRADA "LIMORADA"**

Razvoj ove firme tekao je po obrascu koji je proklamovan u strategiji privrednog razvoja gračaničke općine, koja se oslanja na takozvana mala i srednja preduzeća. Iz male limarske radionice koja je počela samo sa tri radnika 1990. godine razvila se u uspješno i moderno preduzeće koje danas ima 37 radnika, sa prosječnim mjesečnim primanjima od blizu 900,00 KM i očekivanim ukupnim prihodom u ovoj godini od blizu 4 miliona KM. Ovih dana useljava u vlastiti, savremeno opremljen proizvodni prostor, površine 800 m<sup>2</sup>.

Kao vodeća firma u oblasti limarskih radova u BiH, "Limorad" je prisutan u 64 općine Tuzlanskog kantona, Federacije BiH i Republike Srpske, a posredstvom kooperantskih aranžmana, dio svoje proizvodnje i svojih radova plasira na tržištima Slovenije, Hrvatske, Srbije i Crne Gore.

Iako u prvom redu, kao i sva ostala uspješna preduzeća, brine o sopstvenom razvoju i sudbini svojih radnika, u "Limoradu" su svjesni da, ma koliko dobro poslovali, nisu dovoljni sami sebi. Visoka svijest da treba podržati mlade talente u oblasti umjetnosti, nauke i sporta, ali pomoći i socijalno ugrožene i ratom unesrećene sugrađane, jer to još uvijek naša država nije u stanju potpuno obezbijediti, da treba podržati sve ozbiljne projekte koji su na liniji očuvanja naše duhovnosti, vjere, kulture i tradicije - prepoznatljiva je crta ovog preduzeća.

"Limorad" je preduzeće koje pomaže sportske klubove, izgradnju i obnovu vjerskih i kulturno istorijskih objekata, izdavanje knjiga i časopisa, na razne načine pomaže socijalno ugrožene porodice. Vrijednost svih tih donacija je preko 100 hiljada KM. Preduzeće je redovni sponzor 4 fudbalska i 1 rukometnog kluba, a pruža pomoć i ostalim sportskim klubovima na općini Gračanica. koji se takmiče u raznim rangovima.

Donator je izgradnje nekoliko komunalnih objekata u G. Orahovici i Malešićima, stpendira 4 učenika bez roditelja, Zlatni je donator za deminiranje i uređenje korita rijeke Spreče, pomogao je izgradnju i obnovu džamija u Gračanici, G. Orahovici, Međidi, Suhom Polju, Doborovcima, Visokom, Osmaci-ma, Banovićima, Carevoj ćupriji itd. Donirao je oluke za 20 kuća povratnicima u Podrinje, za 2 kuće u Falešićima i po jednu u D. Orahovici, Babićima, Visokom i Tuzli. Pružao je pomoć bolnici u Tuzli, te humanitarnim organizacijama "Osmijeh" i "Koraci nade".

Iza svega toga stoji ličnost prvog čovjeka i vlasnika "Limorada", Vehida Osmanovića. On nije klasični donator koji izdvaja dio sredstava svoje firme u donacije, očekujući od toga neku posebnu marketinšku protivu-slugu, lažno podilaženje ili politički probitak. Ne, Osmanović sa svojim ljudima dobra djela čini na način ili u maniru najljepše bošnjačke tradicije, u maniru naših najboljih vakifa.